

(٢٨)

ذكريات المطر

وبفتكرك وبشتاقلك
في مطرة مغرقة الشارع
ومدخل بيت يلمّ قلوب
بتحضن بعض بتدفي
في نور يرسم ضلال وشك
بلون نفسى على الشباك
وييجى البرق فى عينيكى ويسحبني
ياخذنى فى ثانية ليكى هناك

فى شجرة وحيدة بردانة بغصن و جذع مَّرب

و شمس خريف

بتلمسنى ابتدى أدفى

ولما ابص لعنيها بتتدارى وتتهرب

أنا لوحدى ومن غيرك ساكن دنيا بلا عناوين

يفضل بس لحن حزين ويفيب صوت الفرحة فيها

بيوتها شكل من رسمك

شوارعها على إسمك ومهجورة و من غير ناس

والأقى سلوتى فى زحمة سؤال يائس مالىه إحساس

ليه سبتينى هنا لوحدى وخذتى معاكى كل خلاص؟؟

وأهرب جوه أسئلتى و اتخبى تغطيني

والاقبها بتشغلنى تجيبنى هناك توديني

واتارينى... أنا أهرب من حنينى إليكى تقوم ترمينى لحنيني

وألقي صوت بيتردد يصاحبنى يسلينى

ولما يعلى ويحشرج تبان لى الصحبة دى أنيني

وأَتبَسَّم واستغرب شفائف تدفن الضحكة
معاكى الضحك .. ما كانش بس من قلبى .. ده كان من كل
وجداني
واتوه و افوق و انا بسأل
هيبجى يوم أكون تاني؟؟
وأنا نايم
بشوف صورتك بحس بإن أنا عايش
ولما أصحى
أموت من حسرة ساكناني
وأفهم إنى بتحرك وبتنفس
بشوف و اسمع و اشكر ربى و اتأسف
وأنا عايش فى ذكرى كلها ألوان
أنا لوحدى خيال أو جسم من غير روح
وفى الذكرى و فيها بس أنا إنسان.

القاهرة ٢٧/٢/٢٠١٠